



Rolf Maibach: «Cherline ei cuntenza sco ella ei – a Haiti eis ella in pign star.»



Oz ei Cherline gleiti ina matta, sa ir senza crutschas e perfin purtar sia cusrina. FOTOS MAD

«Sulet la ventira sedubliescha sch'ins parta ella!»

Ils scolars da Lumbrein e Vrin han surdau in schec da 5004 francs pil Hôpital Albert Schweitzer a Haiti

DA SUSI ROTHMUND / ANR

■ **Gia Albert Schweitzer saveva: «Sulet la ventira sedubliescha sch'ins parta ella!»** Quella sabientscha citeschan era Rolf e Raphaela Maibach adina puspei bugen cu els s'engaschan en favur dil Padrinadi Grischun Hôpital Albert Schweitzer Haiti (HAS). Aschia era la jamna vargada cu els han visitau ils scolars dalla scola primara a Lumbrein/Vrin nua ch'els han astgau retscheiver in schec ella valeta da 5004 francs. La fin digl onn vargau ha il scolast e musicist da Lumbrein, *Norbert Capeder* che diregia igl Ensemble da clarinetas Vella, organisau dus concerts da Nadal. Sut sia bitgetta ha igl Ensemble da clarinetas Vella concertau ina ga a Glion en collaboraziun cul Chor cecilian Glion ed ina ga a Vrin en collaboraziun cun ils scolars primars da Lumbrein e Vrin. Entras ina collecta eis ei stau pusseivel da rimnar quels dis 5004 francs. Suentar haver cantau enzacontas bialas canzuns per *Rolf e Raphaela Maibach* han ils affons surdau cun plascher il schec ch'els han maliau sez. Ils Maibachs – che

han sco ei han sincerau gudiu il viadi sullegliv ella Lumnezia cuvretga da neiv – han engraziu cun duas lecziuns da scola specialas. Duront quellas ein ils affons stai aschi attents sco schiglioc probabel darar. Dalla bial'entschatta ein els separicipai plein anim ed interess ed ein stai fetg impressiuai da quei ch'els han udiu e viu. Ils Maibachs han mussau fetg biars maletgs dalla cuntrada d'Artibonite, denton era dalla populaziun che endira fom e dils carstgauns malsaus el Hôpital Albert Schweitzer Haiti (HAS) ch'ei fullanaus. Impressiunonta ei era la seria da maletgs dil tiaratriembel stada, dallas devastaziuns e dalla suffrientscha, nua ch'il miedi d'affons ha per precauziun sortiù ora enqual fotografia. Il pèr ha era raquintau als affons da sia lavur el Haiti e per tgei ch'els daners da donaziuns vegnan duvrai. Naturalmein han ils Maibachs era mussau maletgs d'affons sauns ed ils Lumnezians han empriu ch'els affons a Haiti ein ventireivels sch'els astgan ir a scola e ch'els ein loschs da posseder in'uniforma da scola. Alla fin han ils affons astgau tschentiar damondas ed han fatg quei plein brama, mo per saver ris-

punder tut lur damondas havessen els stuiu desister dil gentar.

«Nies star Cherline»

Forsa seregurdeis vus aunc dalla buoba Cherline che ha – en consequenza d'ina greva malsogna – stuiu schar amputar omisduis peis ella vegliadetgna da sulet dus meins? Adina puspei fatschenta la sort da Cherline ils Maibachs. Tochen ella veta dalla buoba cu ils Maibachs han formau models da gep da sias combettas. Quels models han els priu en Svizra ed igl ortopedist da Cuera, *Johannes Buchli*, ha fatg tenor quels models las empremas protesas per Cherline. Beinspert ha la pintga fatg grond progress. Finalmein ha ella astgau ir a scola ed ha empriu enteifer cuort temps dad ir cun crutschas. «Cherline, ch'ei sesviluppada aschi grondius, ei stada ina motivaziun per nus da realisar suenter il tiaratriembel in luvratori da protesas el HAS», ha Rolf Maibach de-

clarau. Quei oravontut suenter ch'ei seigi reussiu ad el d'entrar en contact cun la Hanger, la pli gronda fabrica da protesas en l'America e cun la Clinica universitara Balgrist a Turitg e quels seigien s'engaschai cumpleinamein. Suentar treis onns eran las empremas protesas grischunas che Cherline haveva survegniu daventadas memia pintgas per ella e perquei ei la buoba stada l'emprema pazienta che ha survegniu protesas novas ord il luvratori niev. Quei luvratori da protesas el HAS ei il pli grond a Haiti ed el fratemp vegn la lavur principala dalla produziun da protesas exequida da tecnicists haitians – anteriurs artisans – ch'ei vegni instrui ella lavur. «Cherline ei ventireivla aschia sco ella ei», ha Rolf Maibach detg ed ils affons lumnezians tedlavan attentamein. «A Haiti ei quella buoba curaschusa oz in star – nies star Cherline», ha il miedi d'affons aschuntau ed ha regalau sco engraziament a tut ils affons ina carta postala da Cherline.

Palm Beach Man of the Year

Igl avrel tuornan ils Maibachs puspei a Haiti per collaborar el HAS. Avunda da far ha ei denton era dau las davosas jamnas ed ils davos meins. Aschia ein els stai hosps a caschun da biaras occurrenz, pil solit a favur da Haiti. «Dasperas denton era ad enqualina cun bia prominenz e firtelfanza», ha Rolf Maibach aschuntau. Ils proxims meins vegni quei a cuntinuar aschia. Ussa che siu temps d'uffeci sco Svizzer digl onn ei vargau ha el gia retschert il proxim uffeci d'honor. Avon enzacons dis eis el vegnius undraus sco «Palm Beach Man of the Year» e sco tal eis el envidiava alla gronda Palm Beach Benefiz Gala a Florida. Tenor Rolf Maibach sa vegnir rimnau – tenor experientscha – a caschun da quella occurrenza plirs 100 000 \$ pil HAS. «Quei tut ei bi ed ei per nus ina conferma da far nosa lavur aunc meglier e cun dapli persistenza», ha Rolf Maibach declarau a l'Agentura da novitads rumantscha.

www.hopitalalbertschweitzer.org

Per donaziuns:
Postkonto: 90-180966-3
IBAN: CH09 0900 0000 9018 0966 3
Bankkonto: GKB 7002 Chur
Konto: CK 393.606.600 Clearing 774
IBAN: CH17 0077 4110 3936 0660 0



Ils scolars da Lumbrein e Vrin han giu instruziun speciala da Rolf e Raphaela Maibach.

FOTO S. ROTHMUND

■ FALERA

Il kino d'unviern da Raiffeisen a Falera

(cp) Il kino d'unviern en la Fermata a Falera muossa sonda proxima, ils 4 da fevrer 2012 ina historia per l'entira famiglia che scauda il cor. Allas 17.30 entschiva il film «Mein Freund, der Delfin»: Sawyer, in buob, anfla ina dunna delfin grevamein blessada e mira da quella. Els dus daventan fetg buns amitgs. Grazia al star Morgan Freeman che gioga il biolog da mar ei la historia aunc pli perschuadenta. Il film ei daus libers per affons naven da 6 onns.

Per dapli action procura la representaziun dalla sera ch'entschiva allas 20.00. Sherlock Holmes ei puspei alla catscha da bandits. Ella successiun dil film da Guy Ritchie «Sherlock Holmes – Spiel im Schatten» cun Robert Downey Jr. drova il capodetectiv tut siu inschign per puder tier professor Moriarty, in um nausch senza scrupels. L'action ed il divertiment ein garanti! Il film entschiva allas 20.00 e cuozia ver duas uras.

Program San Gottardo cun ulteriur collaboratur

■ (anr/hh) Dapi l'entschatta fevrer 2012 consista la squadra operativa dil Program San Gottardo 2020 d'ina ulteriura forza da lavur. *Hubert Gross* ei vegnius tscharnius sco collaboratur per il svilup regiunal cun in pensum da lavur da 50 pertschien. Sias incumbensas cumpeglian il dialog cul turissem, l'economia, la politica e la populaziun dalla regiun sco era la direcciun e coordinaziun da projects, process e gruppas da lavur. Plinavon cooperescha el cun ils responsabls per il svilup dallas quater regiuns dil program Ursera, Blizuna/Vali, part su dil Valleis e la Surselva. Sco quei ch'il meinaproject dil Program San Gottardo 2020, *Marc Tischhauser*, accentuescha, surpren *Hubert Gross* la responsablada per il project davart il process da creaziun dalla marca San Gottardo. La finamira ei d'eruir las atgnadads, mo era las parallelas dallas regiuns dil perimenter dil San Gottardo. En quei connex duein ils aspects culturals, historics ed economics dallas regiuns vegnir risguardai. L'identitad communabla duei vegnir rinforzada. *Hubert Gross* ei sescolaus sil sectur dalla comunicaziun ed ha luvrau ils davos rodund 30 onns en differentas grondas agenturas da reclama da Turitg e dil Grischun. Il davos eis el sefatschentaus denter auter dalla marca Grischun e da sia implementaziun ellas destinaziuns. Pil Program San Gottardo 2020 ein engaschai uss il meinaproject *Marc Tischhauser* sco era *Simon Coray* e *Hubert Gross*.

reclama



«Ich setze alles daran, die Arbeitsplätze trotz Exporteinbussen zu erhalten. Mehr Ferien liegen leider nicht drin.»

Peter Spuhler
Unternehmer und Nationalrat
Stadler Rail

